

二老堂雜誌





志 雜 堂 老 二

著 大 必 周

編主五雲王

編初成集書叢

志 雜 堂 老 二

中華民國二十五年十二月初版

著 者 周 必 大

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

二老堂雜志卷之一

宋 廬陵周必大 著

黜陟

唐虞以三考黜陟幽明而其所命或終身於一職蓋所謂陟若今磨勘轉官年勞換服色也歟

夔制樂

夔始制樂以賞諸侯非謂制樂始于夔也制以賞諸侯或自夔耳

明夷

文王重爻之時紂雖虐而商未危箕子尚爲商臣其明未夷卦之六五已曰箕子之明夷利正此趙賓所以鑿爲蓼茲之說也

教子教國子

孔子教子止于詩禮而不及樂蓋爲學之道成于樂故也周官教國子則樂德樂語樂舞在所先焉聖人所望于公族其至矣乎

後艱終吉

詩稱無後艱易稱有終吉一也

記聞人滋五說

聞人滋以詩言祖妣爲姜嫄其說可用蓋周官大司樂以享先妣在享先祖之前亦謂姜嫄也

禮記內則載養老一段竝與王制同滋曰貴老爲其近于親也

豳詩首言簞發栗烈而後言于耜舉趾滋曰豳地多寒故也

滋曰論語凡稱或者其所言皆無可取故略其姓名如或謂孔子曰子奚不爲政或問禘之說或曰孰謂鄉人

之子知禮乎或曰管仲儉乎或曰雍也仁而不佞或對曰中棖之類

滋曰經史中言五穀以稻爲貴古人各以其類配之如以殺雞配爲黍謂野人之食也以啜菽配飲水謂貧者之孝也以稷食對菜羹謂貶降之食也以麥飯對葱葉謂草具之食也惟食稻則對衣錦言之又祭記則以稻爲嘉蔬公享大夫則稻爲嘉膳是五穀以稻爲貴也

天王

謂王爲天王疑自春秋始蓋孔子之深意也或曰曲禮

不云乎臨諸侯畛于鬼神曰有天王某甫何謂也曰曲禮漢儒所記耳且其下文云措之廟立之王曰帝崔靈恩以謂爲記時有主入廟稱帝之義記者錄以爲法然則天王某甫者亦皆漢儒傳聞之辭耳或又曰莊子載堯舜問答而云天王用心何如則天王之號豈必始于春秋子曰莊周所載未必堯舜本語也

論富貴

孔子曰富而可求也雖執鞭之士吾亦爲之如不可求從吾所好孟子取陽虎之言曰爲富不仁矣爲仁不富

矣蓋死生有命富貴在天不可以力求不可以知爲此
孔孟之學也小人求富爲富無所不至甚者敗國忘家
皆求富爲富者也

論德誠

或問以德行仁者王何謂也曰德者誠也以誠行仁然
後可以王書曰恭儉惟德無載爾僞作德心逸日休作
僞心勞日拙是皆以德對僞故曰德者誠也

酒誥

楊子曰昔之說書者序以百酒誥之篇俄空焉今亡矣

夫以楊子所見爲古文耶則酒誥實未嘗亡而汨作九共稟飫之類逸者甚眾何爲皆不言也以楊子所見爲今文耶則安得渾渾灝灝噩噩之語必有能辨之者

鄭子產

鄭子產火不禳水不禱

昭十九年龍鬪

不覲民以怪也

以智籠愚

上駟中駟之說卽狙公誑狙朝三暮四之說也列子曰聖人以智籠羣愚何必聖人哉

古人作文以事繫月

司馬相如孟冬十月君徂郊祀文選暮春三月江南草長

井蛙驩驪

井蛙不可以語海其見小也驩驪不可以捕鼠其用大也小大雖殊其不適用一也

楚熊渠子李廣射石

新序楚熊渠子夜行見寢石以爲伏虎開弓射之滅矢飲羽下視知石也復射之矢摧無迹熊渠子見其誠心而金石爲開況人心乎李廣在右北平出獵見草中石

以爲虎而射之中石沒矢視之石也他日射之終不能入二事正相類

高祖先主功業

高祖自漢中而興帝業先主乃區區梁益而無成功皆天也非人力也予嘗作諸葛孔明贊云昔我高祖肇迹于茲欲肯其堂敢廢厥基

高祖武帝待士重輕

世言漢高祖最知人故論三傑之功則字謂張良曰子房至蕭何韓信乃名呼之彼待下固有輕重溺冠踞見

者特庸人耳其後武帝雄才大略頗有高祖之風據厠而視大將軍不冠而見公孫丞相至汲黯不冠不見也主父偃智不足以知此西入關欲困衛青以求用而不知武帝所以待青者至薄豈以薦士責之哉其不省也宜矣偃後朝奏書而暮召士固當自致耶

張良不祀

張良之于高祖蓋天授也運籌帷幄姑置未問鴻門之會微項伯以良故背其主而翼蔽沛公則沛公之肉不足以齒項莊之劍矣尙敢望數百年血食哉此社稷功

也子孫縱有大過猶將十世宥之奈何不疑嗣爵纔十年遽奪其國按功臣表則曰坐與門大夫殺故楚內史良傳則曰坐不敬其罪皆不至于不祀而孝文視之蔑如也至元康四年僅復其家卒不紹封漢家真少恩哉或曰良多陰謀奇計造物所忌故雖能以智終而畱國不祀忽諸信乎非也

袁安吳雄葬地

漢袁安父沒母使求葬地道逢三書生指一處云葬此當世爲上公須臾不見安異之于是葬其所占之地故

累世隆盛按安理楚獄之連繫還匈奴之生口臨事如此平時用心仁恕可知矣神物兆祥使之昌熾此豈人力所能至哉范史載之亦足垂勸而世之泥于陰陽家者往往籍以爲口實謂貴賤貧富死生禍福一繫邱墓殊不問行己之如何于是庸師妖巫始得售其術矣若河南吳雄少時家貧喪母營人所不封上者擇葬其中喪事趣辦不問時日醫巫皆言當族滅而雄不顧雄旣以明法律斷獄平起自孤宦致位司徒而子訢孫恭三世廷尉爲法名家此亦范蔚宗所記也予故表而出之

以告不修人事而以袁安爲口實者

皋陶

後漢楊賜傳三后成功皋陶不與左傳云皋陶庭堅不祀忽諸禹固不待言矣契之後爲湯稷之後爲周至唐乃謂系出皋陶天寶中追尊爲德明皇帝

• 以曾子爲聖人

論語泰伯篇以能問于不能以多問于寡有若無實若虛曾子之言也唐太宗乃謂孔子所稱以問孔穎達對曰此聖人教人謙耳一時君臣之間對史氏之筆削皆

不正之而直以曾子爲聖人何也

唐開元錢

舊唐書武德四年七月丁卯廢五銖錢行開元通寶錢
談賓錄以謂歐陽詢所書而青瑱集楊妃別傳乃謂此
錢開元所鑄背有掐痕出于楊妃吳會漫錄已載辨誤
中子謂唐鑄錢多矣今惟此錢徧天下特爲光明燒之
有水銀出可治小兒急驚而餘錢皆不復見何也

韓退之鱷文臺參

韓退之傳載潮州逐鱷事而李翱行狀皇甫湜神道碑